



Datë: 18.06.2025
Numër Protokolli: 4313/2025

A.nr.448/2025

Këshilli i Pavarur Mbikëqyrës për Shërbimin Civil të Kosovës – Kolegji për Shqyrtimin dhe Vendosjen e Ankesave, në përbërje nga: Malsore Gashi Bajraktari, kryetare, Arben Mehmeti dhe Eshref Shabani, anëtarë, me Atdhe Gashi, në cilësinë e procesmbajtësit, ka shqyrtuar ankesën me numër A.nr.448/2025, të datës, 11.03.2025, të parashtruar nga ankuesja B.Sh-R, kundër organit të punësimit: Ministria e Financave, Punës dhe Transfereve, në çështjen juridike “*kontestim konkursi*”, duke vepruar në pajtim me nenin 6, paragrafin 1, nën paragrafin 1.1 dhe nenin 18, paragrafin 1, nën paragrafin 1.2 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, i ndryshuar dhe plotësuar me Ligjin Nr.08/L-180 si dhe në mbështetje me dispozitat e Rregullores Nr.02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, më datë 18.06.2025, mori këtë:

V E N D I M

I. Aprovohet si e bazuar ankesa A.nr.448/2025, e datës 11.03.2025, e parashtruar nga ankuesja B.Sh-R.

II. Anulohet në tërësi procedura e rekrutimit e shpallur sipas konkursit të datës 20.12.2024 me numër të Referencës RN00016115 për pozitën “*Zyrtar i Lartë për Koordinim të Politikave*” e shpallur nga Ministria e Financave, Punës dhe Transfereve, dhe çdo veprim tjetër që rrjedh nga kjo procedurë e rekrutimit.

III. Obligohet Sekretari i Përgjithshëm dhe Njësia për Menaxhimin e Burimeve Njerëzore e Ministrisë së Financave, Punës dhe Transfereve, që të ndërmerr të gjithë veprimet e nevojshme me qëllim të zbatimit të këtij vendimi si në pikën **II** të dispozitivit, në afatin prej pesëmbëdhjetë (15) ditësh, nga dita e pranimi të këtij vendimi.

IV. Këshilli i Pavarur Mbikëqyrës për Shërbimin Civil të Kosovës, duhet të njoftohet me shkrim pas ndërmarrjes së veprimeve në pajtim me këtë vendim.

A r s y e t i m

Ankuesja B.Sh-R. (në tekstin e mëtejme referuar Ankuesja), më datë 11.03.2025 ka parashtruar ankesë me numër protokolli 1591/2025 në Këshillin e Pavarur Mbikëqyrës për Shërbimin Civil të Kosovës, kundër Procedurës së rekrutimit sipas Konkursit me numër reference RN00016115, për pozitën *Zyrtar i Lartë për koordinim të politikave* në Ministrinë e Financave, Punës dhe Transfereve.

Këshilli i Pavarur Mbikëqyrës për Shërbimin Civil të Kosovës (në tekstin e mëtejme referuar Këshilli), bazuar në Rregulloren Nr.02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, ka proceduar kërkesën për përgjigje në ankesë të ankueses në Ministrinë e Financave, Punës dhe Transfereve, ndërsa Këshilli më datë 04.04.2025 ka pranuar përgjigje në ankesë.

Kolegji për Shqyrtimin dhe Vendosjen e Ankesave (në tekstin e mëtejshëm referuar: Kolegji i Këshillit) pas konstatimit se ankesa është e pranueshme në kuptim të dispozitave të nenit 129 të Ligjit Nr.05/L-031 për Procedurën e Përgjithshme Administrative, vendosi për shqyrtimin e të njëjtës, kështu që për vendosje meritore administroi këto prova: Ankesën me numër protokolli 1591/2025, të parashtruar nga ankuesja më datë 11.03.2025 në Këshillin e Pavarur Mbikëqyrës për Shërbimin Civil të Kosovës; Dokument identifikimi; Njoftimin të datës 12.02.2025 për kandidatin fitues; Konkursin me numër reference RN0016115 të datës 20.12.2024; Kërkesën për përgjigje në ankesë; Përgjigjen në ankesë të datës 04.04.2025; Vendimin e datës 03.02.2025 për themelimin e komisionit të pranimit, Akt Emërimet e anëtarëve të komisionit të pranimit; listën e aplikanteve; listën e kandidat të refuzuar dhe kandidatëve të aprovuar; njoftimin e datës 06.02.2025; Listën përfundimtarë të vlerësimit të kandidateve; listën e renditjen përfundimtare të kandidateve të datës 12.02.2025; rezultate e testi me shkrim; formularin vlerësimit të eses për kandidatin A.O dhe ankuesen; formularët e vlerësimit individual për ankuesen dhe kandidatin A.O; Aplikacionin e kandidat A.O i datës 08.01.2025 të bashkangjitur me dokumentet e aplikimit; Aplikacion e ankuese B.Sh-R me date të aplikimit 09.01.2025 të bashkangjitura me dokumente e aplikimit; Testin me shkrim të ankuese B.Sh-R; testin me shkrim të kandidat A.O;

Kolegji i Këshillit pas shqyrtimit dhe analizimit të shkresave të lëndës të dorëzuara nga palët në procedurë ka gjetur se ankesa është e bazuar, **sepse**:

Nga administrimi i shkresave të lëndës rezulton se Ministria e Financave, Punës dhe Transfereve, më datë 20.12.2024, ka shpallë Konkursin publik me numër reference RN00016115, Grupi i Administrimit të Përgjithshëm, gjegjësisht për pozitën e punës *Zyrtar i lartë për koordinim të politikave*-Klasa Profesional 1, me afat aplikimi nga data 21.12.2024 deri më datën 19.01.2025.

Rrjedhimisht, nga shkresat e lëndës rezulton se në konkursin përkatës të punësimit kanë aplikuar gjithsejtë 50 kandidat, ndërsa prej tyre kriteret e konkursit i kanë plotësuar dhe kanë hyrë në listë të ngushtë 19 kandidatë në mesin e tyre edhe ankuesja, e cili ka marrë pjesë në fazën e testit me shkrim ku e njëjta ka grumbulluar 25.4 pike dhe nuk kishte arritur të kalojë fazën tjetër në intervistës me gojë, ndërsa sipas Njoftimit të datës 12.02.2025, të Njësisë së Burimeve Njerëzore në Ministrinë e Financave Punës dhe Transfereve, rezulton se kandidati A.O me gjithsejtë 82 pikë të arritura nga kjo procedurë rekrutimit është shpallur kandidat fituese për pozitën e punës *Zyrtar i Lartë për koordinim të politikave* në Ministrinë e Financave, Punës dhe Transfereve,

Ankuesja, në ankesën e parashtruar në Këshillin e Pavarur Mbikëqyrës për Shërbimin Civil të Kosovës, kundër aktit përfundimtar të kësaj procedure rekrutimi, pretendon se i është bere vlerësim jo meritore dhe është zhvilluar në kundërshtim me ligjin për zyrtaret publik dhe rregulloren Nr.15/2023 për procedurën e pranimit në shërbim civil pasi ka kandidate që gjinden në listën e ngushtë dhe nuk i kanë plotësuar kushte dhe e njëjta kërkon nga Këshilli që kjo procedure e rekrutimit të anulohet.

Kolegji i Këshillit, mbështetur në mandatin kushtetues dhe ligjor lidhur me sigurimin e respektimit të rregullave dhe parimeve që rregullojnë shërbimin civil, e ndërlidhur me nenin 86 paragrafi 2 të Ligjit Nr.05/L-031 për Procedurën e Përgjithshme Administrative, ku përcaktohet se: “*Organi publik përcakton, në mënyrë të pavarur, llojin dhe shtrirjen e shqyrtimit administrativ, si dhe vlerëson nëse një fakt apo rrethanë është e nevojshme për zgjidhjen e çështjes*”, lidhur me këtë çështje ankimore ka analizuar shpalljen Konkursit publik me numër reference RN00016115, respektivisht për pozitën e punës *Zyrtar i lartë për koordinim të politikave* -Grupi i Administrimit të Përgjithshëm, Klasa- Profesional 1, dhe si rrjedhojë nga analizimi i të njëjtit ka gjetur se kërkesa të përgjithshme formale në procedurën përkatëse të rekrutimit kanë qenë, **Arsimimi i kërkuar**:

Diplomë e arsimit të lartë e nivelit të parë (Bachelor). ***Përvoja e punës e kërkuar: se paku 2(vite provoj pune ne fushën për te cilën zhvillohet procedura për plotësimin e pozitës së lirë të punës.***

Kolegji i Këshillit, përpara se të lëshohet në shqyrtimin e pretendimeve të tjera ankimore të ankuesit, mori për bazë Vendimin Nr.08/226 e të datës 23.10.2024 të Qeverisë së Republikës së Kosovës, ku përmes pikës I të dispozitivit është aprovuar Katalogu i Vendeve të Punës për Shërbimin Civil, ndërsa sipas pikës VI të dispozitivit të të njëjtit vendim përcaktohet fakti se vendimi në fjalë hynë në fuqi ditën e publikimit në gazetën Zyrtare të Republikës së Kosovës, dhe për rrjedhojë u konstatua se Vendimi Nr.08/226 i datës 23.10.2024 i Qeverisë së Republikës së Kosovës, është publikuar në gazetën zyrtare me datë 23.10.2024, nga rrjedh se i njëjti ka hyrë në fuqi me datë 23.10.2024, ndërsa konkursi në fjalë është shpallur pasi ka hyrë në fuqi Katalogu i Vendeve të Punës për Shërbimin Civil, përkatësisht më datë 20.12.2024 pra pas hyrjes në fuqi të Katalogut të Vendeve të Punës për Shërbimin Civil.

Duke marrë për bazë Katalogun e Vendeve të Punës për Shërbimin Civil, të aprovuar sipas Vendimit Nr.08/226 të datës 23.10.2024, Kolegji i Këshillit konstatoi se pozita “Zyrtar i Lartë për Koordinim të Politikave”, identifikohet me kodin SHC-0487 në kuadër të grupimit Grupi të Shkencave Shoqërore, kurse fusha e kërkuar e arsimit është përcaktuar sikurse sipas Rregullores (QRK) Nr. 06/2024 Për Klasifikimin e Vendeve të Punës në Shërbimin Civil gjegjësisht është përcaktuar: *Diplome Universitare nga Fakulteti Juridik, Ekonomik (pa specifikim), Sociologji, Antropologji, Filozofi, Histori, Shkenca Politike, Psikologji, Punë Sociale, Gjeografi, Administratë Publike.*

Në këtë kuptim, duke u bazuar në dispozitat e aplikuara të nenit 19, nenit 20 si dhe nenit 31 paragrafi 1 dhe 2 Rregullores (QRK) Nr. 06/2024 Për Klasifikimin e Vendeve të Punës në Shërbimin Civil ku përcaktohet se: ***“19. Kërkesat e përgjithshme formale, përfshijnë arsimin, përvojën e punës profesionale dhe/apo aftësitë e kërkuara për pozitën, kategorinë, klasën apo grupin përkatës që janë të domosdoshme për kryerjen me sukses të detyrave dhe përgjegjësi; 20.1. Kriteret specifike, për pozita të caktuara, mundet të përcaktohen vetëm gjatë procesit të miratimit të përshkrimit të vendit të punës. 20.2. Kriteret specifike mund të përcaktojnë kualifikimin, licencimin dhe/apo certifikimin e posaçëm që kërkohet për pozitën përkatëse. 30.1. Me qëllim të lehtësimit të procesit të klasifikimit dhe grupimit të vendeve të punës për kategorinë profesionale, hartohet katalogu i vendeve të punës në pajtim me këtë Rregullore dhe miratohet nga Qeveria, me propozim të Ministrisë Përgjegjëse për Administratë Publike. 30.2. Katalogu i vendeve të punës përmban emërtimin e pozitës, kategorinë, klasën, grupin dhe kriteret e përgjithshme si dhe përshkrimin e vendit të punës për çdo pozitë.”***, .”, si rrjedhojë Kolegji i Këshillit konstatoi se Ministria e Financave, Punës dhe Transfereve, shpalljen e konkursit me numër reference RN00016115 të datës 20.12.2024 kategoria profesional 1 për pozitën „Zyrtar i Lartë për Koordinim të Politikave” e ka shpallur në kundërshtim me Katalogun e Vendeve të Punës për Shërbimin Civil, i aprovuar dhe i cili ka hyrë në fuqi me datë 23.10.2024 sipas Vendimit Nr.08/226 të Qeverisë së Republikës së Kosovës si dhe në kundërshtim me dispozitat e cekura si më lartë të Rregullores (QRK) Nr. 06/2024 Për Klasifikimin e Vendeve të Punës në Shërbimin Civil, ndërlidhur me Shtojcën Nr.2: Grupet Tip të administrimit të përgjithshëm dhe posaçëm, pasi që pozita në fjalë „Zyrtar i Lartë për Koordinim të Politikave” hynë në kuadër të grupimit **Grupi i Shkencave Shoqërore**, ndërsa sipas konkursit pozita në fjalë është përfshirë në grupin Administrim i Përgjithshëm, dhe për rrjedhojë pozitës në fjalë i janë ndryshuar edhe kriteret e përcaktuara të kualifikimit arsimor të cilat janë të përcaktuara sipas rregullores së lartcekur dhe Katalogut të Vendeve të Punës për Shërbimin Civil, nga rrjedh se procedura e rekrutimit është zhvilluar në kundërshtim me nenin 7 paragrafi 1 të Ligjit Nr.08/L-197 për Zyrtarët Publik, me nenin 19 dhe nenin 31 paragrafi 1 dhe 2 Rregullores (QRK) Nr. 06/2024 Për Klasifikimin e Vendeve të Punës në Shërbimin Civil.

Andaj, duke marrë për bazë konstatimet e dhëna si më lartë, dhe meqenëse Kolegji i Këshillit konstatoi se në këtë procedurë të rekrutimit shkeljet janë evidentuar që nga shpallja e konkursit të datës 20.12.2024, ashtu që nuk janë përfillur kriteret e aprovuara lidhur me grupimin e pozitës, duke ndryshuar më pastaj edhe kriteret për fushën e kualifikimit arsimor për pozitën „Zyrtar i Lartë për Koordinim të Politikave,” duke u bazuar në dispozitat e nenit 53 dhe nenit 55 paragrafi 1 të Ligjit Nr.05/L-031 për Procedurën e Përgjithshme Administrative, me qëllim të kthimit të ligjshmërisë vendosi sikurse në dispozitivin e këtij vendimi që të anuloi konkursin e datës 20.12.2025 me numër të Referencës RN00016115 për pozitën „Zyrtar i Lartë për Koordinim të Politikave,” në Ministrinë e Financave, Punës dhe Transfereve si dhe të shfuqizoi çdo akt dhe veprim tjetër procedural që ndërlidhet me konkursin në fjalë.

Kolegji i Këshillit thekson faktin se meqenëse konstatoi paligjshmërinë e aktit të shpalljes së konkursit në fjalë, nuk u lëshua në shqyrtimin e pretendimeve të tjera ankimore të ankueses të parashtruara si në ankesën e datës 24.02.2025, pasi që konstatimi nëse pretendimet janë apo jo të bazuara nuk do ta ndryshonin natyrën vendimmarrëse të kësaj çështje administrative, ndërsa ankesa e ankueses është aprovuar vetëm për arsyet e dhëna si në arsyetimin e këtij vendimi.

Thënë si më sipër, e në mbështetje të nenit 18 paragrafi 1 nën paragrafi 1.2 të Ligjit Nr.06/L-048 për Këshillin e Pavarur Mbiqyrës për Shërbimin Civil të Kosovës si dhe nenin 132 paragrafi 2 të Ligjit Nr.05/L-031 për Procedurën e Përgjithshme Administrative, Kolegji i Këshillit vendosi si në dispozitiv të këtij vendimi.

Vendimi hyn në fuqi ditën e nënshkrimit nga Kryetarja e Kolegjit.

Këshillë juridike: Kundër vendimit të Këshillit, pala e pakënaqur e cila pretendon se vendimi i Këshillit nuk është i ligjshëm, mund të iniciojë konflikt administrativ në gjykatën kompetente, Gjykatën Themelore në Prishtinë/Departamenti për Çështje Administrative brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi.

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS

Lënda me numër A.nr.448/2025

Atdhe GASHI

Procesmbajtës

Malsore GASHI-BAJRAKTARI

Kryetare e Kolegjit

Vendimi i dorëzohet:

- Ankueses B.Sh-R;
- Ministrisë së Financave, Punës dhe Transfereve (Sekretarit të Përgjithshëm dhe dhe Menaxheres së Burimeve Njerzore); dhe
- Arkivit të KPMSHCK-së.